

Na osnovu člana 13. Zakona o principima lokalne samouprave u Federaciji BiH („Službene novine FBiH“, broj: 49/06 i 51/09), člana 17. Statuta Opštine Glamoč - prečišćeni tekst („Narodne novine Opštine Glamoč“, broj: 1/15), a u skladu sa članom 37. stav (1) i članom 38. stav (2) Zakona o stočarstvu („Službene novine FBiH“, broj: 66/13) i člana 29. stav (2) Pravilnika o pčelarstvu („Službene novine FBiH“, broj: 31/18), Opštinsko vijeće Glamoč na sjednici održanoj dana 26.03.2024. godine, d o n i j e l o j e

ODLUKU

o načinu i uslovima korištenja pčelinje paše na području opštine Glamoč

Član 1.

Ovom Odlukom propisuju se uslovi i način korištenja pčelinje paše na području opštine Glamoč i visina naknade za upotrebu pašnjaka za seleće pčelinjake.

Član 2.

Pčelinju pašu na području opštine Glamoč, pored vlasnika pčelinjih društava sa prebivalištem na području opštine Glamoč, mogu koristiti i vlasnici pčelinjih društava iz drugih opština unutar BiH i to samo iz onih sredina koje su slobodne od zaraznih bolesti, pod uslovima propisanim Zakonom o stočarstvu, Pravilnikom o pčelarstvu i ovom Odlukom.

Član 3.

- (1) Vlasnicima pčelinjih društava sa područja drugih opština, može se odobriti korišćenje pčelinje paše samo na osnovu dobijenog rješenja o odobrenju korištenja pčelinje paše na području opštine Glamoč.
- (2) Rješenje o odobrenju korištenja pčelinje paše donosi Služba za privredu, finansije i inspekcijske poslove Opštine Glamoč na osnovu podnijetog zahtjeva vlasnika pčelinjih društava za odobravanje smještaja pokretnog pčelinjaka koji se nalazi u Prilogu I. ove Odluke i čini njen sastavni dio.
- (3) Zahtjev za donošenje rješenja iz stava (2) ovog člana sadrži najmanje:
 - a) Ime i prezime, odnosno naziv vlasnika pčelinjaka (obrta),
 - b) Jedinstveni identifikacioni broj pčelinjaka iz Registra pčelara i pčelinjaka,
 - c) Broj pčelinjih društava/košnica koje se prevoze,
 - d) Polazno mjesto i odredište na koje se sele pčelinja društva,
 - e) Vrijeme boravka pčela na traženoj lokaciji,
 - f) Ime i prezime pratioca pčela.
- (4) Uz zahtjev iz stava (2) ovog člana, pčelar prilaže:

- a) Pismenu saglasnost vlasnika, odnosno korisnika zemljišta na kojem će biti postavljen pčelinjak,
 - b) Uvjerenje o zdravstvenom stanju pčela izdato od nadležne veterinarske službe koje ne može biti starije od mjesec dana od dana podnošenja zahtjeva,
 - c) Dokaz o uplaćenju naknadi za korištenje pčelinje paše za tekuću godinu,
 - d) Za korištenje pašnjaka u državnom vlasništvu, a koje nije izdato u zakup trećim licima, prilaže se izjava vlasnika pčelinjih društava o namjeri korištenja određene katastarske čestice za pčelinju pašu, da na istoj neće biti pričinjena materijalna šteta, te da će u slučaju počinjene materijalne štete na zahtjev Službe pčelinjak biti uklonjen u roku od 48 časova i da će pričinjena šteta biti nadoknađena.
- (5) Ukoliko podnosilac zahtjeva za odobrenje za pčelinju pašu ne dostavi navedenu dokumentaciju, isti će biti obaviješten pisanim putem da dopuni zahtjev u roku od 8 (osam) dana od prijema obavještenja.
- (6) Opštinska služba je dužna u roku od 15 (petnaest) dana od dana podnošenja zahtjeva, odobriti ili odbiti postavljanje pčelinjaka na traženu lokaciju.
- (7) Smatra se da je dozvoljeno smještanje pčelinjaka na traženom području ako se u propisanom roku iz stava (6) ovog člana ne izda saglasnost ili ne obavijesti pčelar.

Član 4.

- (1) Na pčelinjaku koji je doseljen na određenu lokaciju mora na vidnom mjestu biti istaknuta identifikaciona tabla najmanje visine 300 mm i dužine 400 mm koja sadrži slijedeće podatke:
- a) Ime i prezime, odnosno naziv vlasnika pčelinjaka (obrta),
 - b) Adresa i kontakt telefon vlasnika pčelinjih društava,
 - c) Oznaka Federalnog ministarstva poljoprivrede, vodoprivrede i šumarstva – „FMPVŠ“,
 - d) Jedinstveni identifikacioni broj pčelinjaka iz Registra pčelara i pčelinjaka.
- (2) Podaci se ispisuju slovima visine do 30mm latiničnim pismom.
- (3) Izradu i postavljanje identifikacijske ploče na pčelinjaku provodi vlasnik.

Član 5.

- (1) Radi zaštite stanovništva i domaćih pčelara sa prebivalištem na području opštine Glamoč, seleći pčelinjaci koji se dovoze na pčelinju pašu na teritoriju opštine Glamoč mogu se postaviti samo u nenaseljenom području na udaljenosti najmanje:
- a) 500 metara vazdušne linije od proizvođačkih i prerađivačkih pogona i javnih objekata (škole, vrtići, igrališta...),
 - b) 1.500 metara vazdušne linije od prvog susjednog stacionarnog pčelinjaka.

- (2) Za postavljanje pčelinjaka na ostalim područjima moraju biti ispunjeni i uslovi propisani zakonskim i podzakonskim aktima iz ove oblasti.

Član 6.

- (1) Vlasnik pčelinjih društava dužan je zbog čuvanja pčela od napada drugih pčela ukloniti sve povode za pojavu grabeža.
- (2) Vlasnik pčelinjih društava dužan je osigurati sve potrebne mjere radi sprječavanja pristupa domaćih i divljih životinja pčelinjaku.
- (3) Vlasnik pčelinjih društava dužan je osigurati higijenski ispravno pojilište za pčele.
- (4) Za bezbjednost selećih pčelinjaka (osiguravanje od krađe pčelinjih društava, štete nanesene na bilo koji način), na odobrenim lokacijama, odgovorni su isključivo vlasnici pčelinjih društava na selećim pčelinjacima.

Član 7.

- (1) Naknada za korištenje pčelinje paše za jednu godinu po jednom pčelinjem društvu iznosi 5 (pet) KM. Naknada se uplaćuje na račun Opštine Glamoč.
- (2) Novčana sredstva od uplaćene naknade za korištenje pčelinje paše mogu se koristiti samo za unaprjeđenje pčelarstva (zaštita od pčelinjih bolesti, nabavka lijekova, pomoć i podsticaj registrovanim pčelarima i udruženjima iz oblasti pčelarstva).

Član 8.

- (1) Kontrolu o poštivanju odredbi ove Odluke na selećim pčelinjacima vršiće komisija sačinjena od tri člana iz Opštinskog organa uprave koja će biti formirana rješenjem opštinskog načelnika.
- (2) Kontrola se vrši periodično, u dogovoru između članova komisije ili po podnesenoj prijavi od strane trećih lica.
- (3) U slučaju kršenja odredbi ove Odluke od strane vlasnika selećeg pčelinjaka Komisija će obavjestiti Kantonalnu upravu za inspeksijske poslove.

Član 9.

- (1) Novčanom kaznom od 500 – 1.000 KM kazniće se za prekršaj pčelar ako:
- postavi seleći pčelinjak na području opštine Glamoč bez izdatog Rješenja nadležne opštinske službe iz člana 3. stav (2) ove Odluke,
 - ne postavi na vidno mjesto na pčelinjaku identifikacijsku tablu za obilježavanje pčelinjaka sa potrebnim podacima propisano članom 4. ove odluke,
 - postavi pokretni pčelinjak suprotno odredbama člana 5. ove odluke.

Član 10.

Nadzor nad sprovođenjem ove Odluke vrši Kantonalna uprava za inspekcijske poslove, putem poljoprivredne i veterinarske inspekcije, svaka u okviru svojih nadležnosti.

Član 11.

Ova Odluka stupa na snagu danom objave na oglasnoj tabli i službenoj internet stranici Opštine Glamoč, a biće objavljena u „Narodnim novinama Opštine Glamoč“.

Broj: OV-01-02-01-38/24

Datum, 26.03.2024. godine



Predsjednik OV-a
Marko Damjanović